

Kontuola

ANTZUOLA / Eguena / 2005eko irailaren 8a / 255. zenbakia

KOORDINATZAILEA: Aintzane Irizar • Barrenkalea 33 BERGARA 20570 • Tel.: 943 25 05 02 • Faxa: 943 25 05 13 • Posta elektronikoa: kontuola@goiena.com • Lege gordailua: SS1179/02

Telleria etxeko larrugintzako materiala sailkatu eta berreskuratzen dabil Udala

AINZANE IRIZAR

Telleria larru ontze lantegiko materiala sailkatzen dihardu Udalak. Gero, material hori garbitu, sendatu eta biltegi baten gordeko dute. Oraingo astean bertan hasi da sailkatze lanetan Josu Tellabide etnologoa. Datorren urtean proiektua idatziko dute.

Makinak, larruzko materiala, bulegokoak... Denetik dago Telleria etxeko azkeneko solairuan. Material hori guztia katalogatu, garbitu, sendatu eta biltegi baten gordetzea da Udalaren asmoa. Aurretik, lantegi horretako dokumentazioa eta artxiboa sailkatu zuten Udalak; lan hori eginda dago.

Oraingo astean bertan hasi da katalogatze lanetan Josu Tellabide etnologoa. Ezagutzen du Josuk gure herria; izan ere, Zaharkinak proiektuan ere jardun zuen lanean.



Telleria lantegia izan zen eraikinean, larru ontzeko material ugari dago.

DIPUTAZIOAREN LAGUNTZAREKIN

Lan hori guztia egiteko Gipuzkoako Foru Aldundiaren dirulaguntza jaso du Udalak; 10.000 euro jaso ditu, hain zuzen ere. Diru horrekin eta Udalak jarritakoa-

rekin, material guztia sailkatu, garbitu eta sendatu egingo dute. Gero, datorren urteari begira, proiektua idatziko du Udalak, dituen asmoak gauzatzeko.

INTERPRETAZIO GUNEA

Udaleko arduradunen asmoa da daukaten material guztiarekin interpretazio gunea bat sortzea; horrela, herritarrek ikusi ahal

izango lukete larru ontzearen prozesua, industria horren garrantzia eta historia herrian, egiten zituzten produktuak, eta abar. Gune edo museo txiki hori Telle-

Udalaren nahia da larru ontzearen gaineko interpretazio gune bat sortzea

ria etxeko beheko solairuan jar-tzea izango litzateke Udalaren asmoa, baina hori guztia zehazteke dago oraindik.

LARRU ONTzea ANTZUOLAN

Larru ontzearen industriak garrantzi handia izan zuen Antzuolan. XX. mende erdialdean izan zituen langile gehien industria honek; 1946an, esaterako, 79 langile zeuden herrian.

Telleria lantegiari dagokionez, berriz, aipatzekoa da *kurtiderixiaren* eraikina orain dela urte gutxi eraitsi zutela. Oraingo eraikinean, berriz, produktuak ekoizten zituzten, tailerra zegoen hantxe; gerrikoak, zapatak eta abar ekoizten zituzten.

Batez ere, gerra ostean izan zuten indar handia larru ontzearen industriak.

HERRITARRENHITZA/ Joseba Lezeta • Kazetaria

Kalegoiko etxea

Hilabete eman dut, abuztu osoa, Antzuolara joateke. Eta Antzuolako kontuez jardun behar... Hala ere, nahikoa da pare bat lagunekin topo egitea gure herriko kontuen berri izateko. Zarautzen egon nintzen batekin eta Donostian beste batekin. Biek kontu bakarria aipatu zidaten, ez ei da beste konturik egon Antzuolan joan den hilabete-an: Kalegoiko 10 zenbakiko etxea. Abuztu hasieran aldarmioak jarri eta bukaerarako kendu dituztela. Fatxada txukundu, goiko aldean adreiluak bistaratu eta ederra geratu omen da, ikusgarria.

Herriguneko lekurik politenetakoa da, egun, Kalegoi. Aipatutako etxean egindako obrarekin, berriz, are politagoa. Eta ez dut hori idatzi bertan bizitakoa naizelako. Ez du Kalegoiko etxeak Herriko Plazak eta Kalebarrenek adinako famarik, ezta tabernarik ere.

Soziedade bat bai orain, Danok Bat, hain justu. Baina, bere kale estua eta etxe zahar asko berritu ondoren,



"Itxura denez, gutxi ibiltzen gara antzuolarrok tabernetan"

badu bere izaera berezia. Badu, hala ere, batere gogoko ez dudana zerbait ere. Kontxaneko etxe pareko bidegurutzea. Bihurgune aldrebesa da, benetan.

Dena dela, bada Antzuolan irailera-ko eta urrirako kezkatzen nauen zerbait: taberna falta, hain zuzen ere. Azken jorraketaren ondoren, zapki taberna gelditu dira. Asko oraindik, zenbaiten ustez. Gutxi

niretzako, nahiz eta taberna gizona ez naizen.

Beranduko oporrak direla eta, laster itxi egingo dute haietakoren bat eta orduan kafea hartu ala mokauren bat egiteko ia aukera barik izango gara.

Ederra litzateke kafea hartzeko ere herritik ihes egin beharra. Itxura denez, gutxi ibiltzen gara antzuolarrok tabernetan. Biren atean itxi zituzten eta bat zabalduko ote duten zain gaude orain. Tabernarako afizioa bultzatzea politikoki zuzena ez da izango, baina zer edo zertan hasi beharra dugu.

LABUR

Uzarraga-Lizarraga errepidearen lanak lehiaketara

Antzuolako Udal Etxegintzak lehiaketa publikora ateratu ditu Uzarragarako zubitik Lizarraga auzorainoko errepidearen lanak. Baldintza pleguak ere onartu zituen, abuztuaren 23an egindako batzarrean. Lan horiek bost hilabetean bukatu beharko ditu esleipena eskuratzen duen enpresak, eta aurrez izango da. Irailaren 23ra arte izango dute enpresa erabiltzaileek proposamenak aurkezteko aukera.

IKASTAROAK

Ikastaro aukera zabala eskaini du Udalak ikasturte berriari begira

Kirola eta kultura, denetik dugu aukeran Udalak egindako ikastaro eskaintzan. Urrian hasten dira ikastaro gehienak; aerobik eta gimnasia ikastaroak, baina, astelehenean, irailak 12, hasiko dituzte. Aipagarrien artean, dantza eta masaje ikastaroak.

Aerobik, gimnasia eta erretiratuendako gimnasia ikastaroak irailaren 12an, astelehena, hasiko dituzte.

Gainerako ikastaro guztietan izena emateko epea irailaren 16an, egubakoitza, bukatuko da.

Yoga eta masaje ikastaroak Jose Luis Armendiak eskainiko ditu. Astelehen eta eguaztenetan

izango da yoga ikastaroa, 17:00etan edo 19:00etan, Olaranen. Hileko kuota 16 euro izango da, eta 30 euroko matrikula ordaindu beharko da, fidantza moduan. Masaje ikastaroa, berriz, eguaztenetan izango da, 19:00etan, irailaren 29tik abenduaren 22ra. 35 euro ordaindu beharko da.

Tai Chi ikastaroa ere izango dugu, urriaren 4an hasita, mar-

titzen eta eguaztenetan, 18:00etatik 19:00etara. Hileko kuota 20 euro izango da; beste 20 euro, berriz, fidantza. Oskar Torresek eskainiko du ikastaro hori.

DANTZAK ETA ESKULANAK

Edurne Uribesalgok eskulan ikastaroa eskainiko du, urriaren 6an hasita. Eguaztenetan izango da, 15:15etik 17:15era, Olaranen. Prezioa, 90 euro.

Marrazketa eta pintura ikastaroan, berriz, Antton Arrillaga izango da irakaslea; urriaren 4an hasiko da eta martitzenetan izango da ikastaroa, 19:00etatik 20:30era. Prezioa, 90 euro.

Azkenik, dantza ikastaroa dugu; zapatu arratsaldeetan izango da, urriaren 8an hasita. Prezioa, 30 euro.

Yoga, masajea, eskulanak, pintura, dantza, Tai Chi aerobika eta gimnasia aukeran



Yoga ikastaroa irailaren 26an hasiko da eta Jose Luis Armendiak eskainiko du.



Tere Sanchezek zabalduko du Arin taberna eta jatetxea

Ekainean Aitz-Garbi taberna itxi zuten, baina, haren lekua beteko duen beste bat zabalduko dute laster, Arin, hain zuzen ere. Tere Sanchezek zabalduko du, datorren hilean; urriaren 13an egingo dute inaugurazioa. Bi urte pasatxo dira azkeneko aldiz ateak itxi zituela; harrezkero, herriko jaietan bakarrik egon da zabalik. Ea, bada, ondo joaten zaion Tereri! /A.I.

LABUR

Antzuolako Udalaren webguneak baserrien gaineko atal berria dauka

Atal berri batekin datorkigu Antzuolako webgunea (www.antzuola.com). Baserrien gaineko atal bat gehitu diote Udaleko arduradunek; *Antzuola* atalaren barruan, *Planoak* aukera sakatu eta hantxe aurkituko ditugu herriko baserri guztien argazkiak, auzoka antolatuta. Auzo bakoitzaren planoak ere erakusten zaizkigu.

Gurutz Larreak Euskadiko junior mailako selekzioarekin parte hartuko du Suitzan

Bihar, egubakoitza, Suitzan, Rübliand-eko Sari Nagusia jokatuko du Gurutz Larreak, Euskadiko junior mailako selekzioarekin. Elorriaga, Gonzalez, Lapazaran, Leanizbarrutia eta Morras izango ditu taldekide. Bestalde, aipatzekoa da udan ere lan bikaina egin duela. Abuztuan, Ergobian, irabazi egin zuen. Aurreko asteko domekan, berriz, bosgarren geratu zen, Lierniako igoeran.

Frontoia askotan itxita topatzen dutela eta, herritar batzuek euren kexa azaldu digute

Hainbat herritarrek euren kexa azaldu digute abuztuan zehar, behin baino gehiagotan, goizean pilotan jokatuzera joan eta itxita egon delako frontoia. Udalean azaldu digutenez, urtean zehar Olalde elkarteak arduratzen dira frontoia zabaldu eta ixteaz. Abuztuan, berriz, Udaleko langileak arduratu dira zabaltzeaz eta boluntario azaldu zen herritar bat, berriz, frontoia ixteaz.

zabalo
IGELTSEROTZA
Jose Luis Zabalo
Kalegoi 9, 1. solairua
ANTZUOLA.
Tel. 943 76 60 89
Faxa: 943 76 60 14

ZAHAR BERRITZEAK:
Fatxadak
Bainugela eta sukaldea
Lokal komertzialak
Teilatuak

**Eta orain....
GREMIOEN
KOORDINAZIOA**

SUKALDEKO ALTZARIAK

Harizki

MUEBLES
IGEA

Sukalderako eta bainurako altzariak
Altzari rustikoetan
espezializatuak

Zurrategi plaza 4, behea. ANTZUOLA. Tel. eta faxa 943 78 71 80